

Basler Zepf Ziri



Mutze-Bebbi Bärn



Aadie UKW

Dr Broloog isch analog

Wenn als Staizytmentsch hesch welle
wisse, wäär schnitzt Suppekelle,
wäär kaa s Fäll vom Mammuth schelle,
wäär vom Blocher d Gschicht verzelle;
eb dr "erectus" scho uf d "sapiens" stoot,
oder no im ne-ander-tal fremd goot;
hoggsch ans Fyyr vo diiner Sippe
zem loose, schnäädere, gossippe.
Waas em Ötzi s Fyyr isch, s hälle,
wäärde uns denn d UK-Wälle.
Mängge het ums Raadio umme,
Gmainschaft, Liecht und Weermi gfunde.
Vom "Wunschkonzäart" uff d Maladière,
"Spass partout" - drotz FCB-Misere,
im "Rendez-vous" drängt d Wält per Schall
in dii Auti, Wäärggstatt oder Stall.

Doch laider isch nit jeede Sänder
wie d BaZ e sälbschtloos Woorets-Spänder.
Dick-daatore baue grossi Ständer,
fir mit Hass z beschalle iiri Länder.
D Nazi verdaile Volggsempfänger,
mache us Mentsche Welf und Lämmer,
mit Muusig, zem im Taggt marschiere
(dr eerschi Schritt zem Massakriere).

D SRG het anno 31 scho
fir d Schwyz s Raadio-Monopol bikoo,
het s Dängge glänggt, entscheide gäärn:
Daas isch Muusig, und daas nur Läärm.
Wil d UKFee bringt UKW
isch s um das Monopol denn gschee.
Dr Schawinski sändet us em Schnee
- drotz Steersänder vo dr PTT -
vo Italie bis an Zürisee.
D Juuged – mit Krawalliers-Deliggt -
zaigt, dass sii doo anderscht tiggt:
Kommunal und frei sell Raadio syy,
Raadio 24, hilf derbyy!
Piraatesänder hänn glyy s Saga,
vo Raadio Eriwan bis Gaga.

Digidaal goots zem Fanal

Hesch Du UKW statt DAB
isch s ums analoge Raadio gschee.
D SRG spaart Sänder yy und macht, bigott,
us Millione Raadio Elektroschrott.
gRöschti muess syy Bartei zitiere:
Halbiere goot iiber studiere!
Soo blybt vom lingge Service public
halt nyt rächts übrig.

Ooni DAB+ bis duss,
heersch numme Raadio Tinnitus.
**Loos. Heersch im digidaale Rusche
dr rächti Mob duurs darknet husche?**
Orbans Demokratie-Scharaade
und homophobi Musk-erade?
Heersch der J.D. Wanze schimpfe,
äär syygi geege "woke" und Impfe.
E jeede deerf saage, waas äär wott,
nur gmacht wiird, waas dr Sheriff sait, bi Gott.
Heersch d Milliardääre nää, waas si wänn
(Verachtig isch s ainzig, waas sii gänn)?
Money-puliere, abserviere,
abkassiere, sich Trump-iere.
S stiilt dr moraalisch Boodesatz
dr 3. Wält iire Boodeschatz.
Heersch dr Köppel, Muurer? Miir wird schlächt,
weenigschtens sinn die mee schlächt als rächt(s).
Heersch d BundesbresidÄnte: "Look,
Donald, I am wie Duu, e Duck".

**Doorum bruucht s scho glyy in vyyle Länder
wiider UKW Piraatesänder.**